


TEZAU LITURGIC
17 OCTOMBRIE

SLUJBA
SF.APOSTOL
LAZĂR
AL CIPRULUI
ADUCEREA MOAȘTELOR
DE LA LARNAKA
LA CONSTANTINOPOL



MOSCOVA, 2000



Служба святому праведному Лазарю Четверодневному, епископу Китийскому

НА ВЕЧЕРНИ

Блажен муж: 1-й антифон.

На Господи, возвах: стихиры, глас 1:

Память твою священную совершаем, / друже
Слова воплощенного, Лазаре всечестне, /
проповедниче Евангелия и воскресения
вестниче, / темже и мощей твоих раку верою
лобызаем, / источающую благодать неоскудную
и просвещение // любовь притекающим,
Богоблаженне.

Яко друга Христова / похваляем тя любовью,
Лазаре блаженне, / и верно вопием тебе: /
избави паству твою, ейже от Бога вверился еси,
/ всякия скорби, и нужд, и соблазнов, // и
всякаго озлобления.

Верна тя друга Своего / Христос
свидетельствует, Лазаре чудне, / и проливает
слезы Своя над гробом твоим, / и воздвигает тя
от преисподних // ко благовестию всех
воскресения.

Ины стихиры, глас 4:

Солнце славы, Христос Бог наш, / яко лучу ты,
преславне Лазаре, посла / в мирская
исполнения, / крепко отгонящую безбожия мглу
/ и просвещающую Кипряны, во тьме неведения
сидящих, / ихже наследники содела Света, //
друзе Спасов Богомудре.

Приял еси дарование равноапостольное, / на
демоны непобедимую власть и силу, / о имени
Христове, начала тьмы отгоняти, / прошел еси
землю, просвещая, якоже солнце, / и, на Кипр
славный пришед, / Христово проповедал еси,
Лазаре славне, // спасительное пришествие и
воскресение.

Народ кипрский привел еси Христу Богу,
блаженне, / избавленный кровию на земли
родиться благоволившаго / и Крест и смерть
волею претерпевшаго, / Егоже ныне моли,
Лазаре досточудне, // даровати душам нашим
мир и велию милость.

Слава, и ныне, глас 2:

Велие и преславное чудо совершися днесь, / яко
мертвеца четверодневнаго, / из гроба Христос
возгласив воздвиже, и друга призва: /
славословим Его яко преславна, // да
молитвами праведнаго Лазаря спасет души
наша.

На литии стихира храма и Лазаря, глас 1:
Светлая твоя жизнь, Лазаре всечестне, / показа
тя друга Спасова возлюбленного, / Емуже
помолися, славне, // о верою совершающих
святую память твою.

Слава, и ныне, глас тойже:
Жизнь сый Господи, и свет истинный, / Лазаря
возгласив воскресил еси: / яко силен бо всем
показал еси, // яко Бог живых и мертвых еси.

На стиховне стихирь, глас 2:

Подобен: Доме Евфрафов:

Дом Духа Святаго / явился еси, досточудне, /
благодатию Господнею, / просвещая и
наставляя Христову Церковь // словесы
Богоразумия.

Стих: Возвеличите Господа со мною / и вознесем
имя Его вкупе.

Помаза ты достойно / благодать Святаго Духа, /
всеблаженне Лазаре, / истины Христовы ради
// и нравов твоих ради благости.

Стих: На Тя, Господи, уповах, / да не постыжуся
во век.

Веселится о тебе, о, Лазаре, / Кипра Церковь
славная, / имея в себе честныя твоя мощи, / и
радостно прославляет // милость и чудеса твоя.

Слава, глас тойже:

Троицы вернаго служителя, / Церкви
свещильника всесветлаго, / Лазаря, друга Божия
предивнаго, / ныне, в память его сошедшеся, //
воспоим любовию.

И ныне, глас тойже:

Пресвятая Мати Божия, / с лики Небесными /
молися из Тебе Воплощенному, / Солнцу
Правды, Господу, // спасти и просветити души
наша.

Тропарь, глас 4:

Живоносные глаголы Спаса в сердце своем
приял еси / и глас повеления Заждителя в
преисподних услыша, / текий восташе с
пеленами, показуя державу Христову / и
послежде проповедуя в языцех Того славное
Воскресение, / Лазаре друже Господень
досточудне, / моли, Егоже возлюбил еси, //
помиловати души наша.

Ин тропарь перенесению мощей, глас 4:

Яко велико сокровище и богатство некрадомо /
к нам прииде из Кипра, Лазаре, / Промыслом
всех Бога, повелением царя благочестива, /
подая чтущим тя исцеления дары, / избавляя от
бед и от всякаго вреда, / верою взывающих ти:
// спаси всех молитвами своими, Лазаре отче
наш.

НА УТРЕНИ

На Бог Господь: тропарь святаго дважды.
Слава, и ныне, Богородичен.

По 1-м стихословии седален, глас 1:
Апостолом единоправен быв, Лазаре Богомудре,
/ течение совершил еси, / труды
первосвятительства на Кипре подъял еси, / но
моли с ними всех Содетеля и Содержителя / от
всех лютых нас избавити.

Слава, и ныне, глас тойже:
Едина истинная христиан Покровительнице, /
всяких лютых обстояний, / бед и скорбей нас
избави / и молитвами Твоими спаси души наша.

По 2-м стихословии седален, глас 2:
О всех к Богу молитвенник и ходатай, / Лазаре
всеблаженне, Китии похвало, / избави, молимся,
настоящий беды рабы твоя // и пламене
будущаго Божественною молитвою твоею.

Слава, и ныне, глас тойже:
Устами и сердцем величаем Тя, / Дево Мати: /
Ты же, рождшая Бога, / не отрини нас от Твоего
заступления.

Величание:
Величаем тя, / святой праведный отче Лазаре, /
и чтим болезни и труды твоя, / имиже трудился
еси // во благовестии Христове.

Псалом избранный:

1. Исповемся Тебе, Господи, всем сердцем моим, повем вся чудеса Твоя. 2. Бог нам Прибежище и Сила, Помощник в скорбех, обретших ны зело. 1. Исповемся Тебе в людех Господи, воспою Тебе во языцех. 2. Суди ми, Господи, яко аз незлобою моею ходих. 1. Искуси мя, Господи, и испытай мя, разжи утробы моя, и сердце мое. 2. Да не погубиши с нечестивыми душу мою. 1. Терпя потерпех Господа, и внят ми, и услыша молитву мою. 2. Нога моя ста на правоте: в церквах благословляю Тя, Господи.

По полиелеи седален, глас 8:

Звезду Богосветлую, Кипра светильника, / веры насадителя и добродетели честное правило, / Лазаря Божественного, вернии, восхвалим, / со Ангелы бо радуется, / приим венец нетления от Самого Бога, / и молится спастися душам нашим.

Слава, и ныне, глас тойже:

Якоже рекл еси Господи Марфе: / Аз есмь Воскресение, / делом слово исполнил еси, / из ада воззвав Лазаря. / И мене Человеколюбче мертва страстьми, / яко сострадательн воскреси, молюся.

Таже степенна, 1-й антифон, глас 4.

Прокимен, глас 4: Уста моя возглаголют премудрость, / и поучения сердца моего разум. Стих: Услышите сия, вси языцы, / внушите, вси, живущие по вселенней.

Всякое дыхание:

Евангелие от Матфея, зачало 11.

По 50-м псалме стихира, глас 6:

Свыше назираеши твоя певцы, Лазаре святе, / сим подаеши всегда недугов исцеления, и страстей уставление, / и искушений всяческих избавление молитвами твоими, // яко да поют Бога препрославленного.

Канон святому, глас 8.

Песнь 1.

Ирмос: Воду прошел яко сушу, / и египетского зла избежав, / израильтянин вопияше: // Избавителю и Богу нашему поим.

Песньми твое всеславное поющу, Лазаре, восстание и труды апостольския, с Небесе ми зарю спасения дати молися.

Друг явился еси Спаса Господа, досточудне, от Него почерпн еси воду живу, еюже удобрил еси жаждущих сердца, Лазаре славне.

Слава: Всем Пребожественнаго познание Божества показал еси, из мертвых возставив четверодневнаго Лазаря Владыко.

И ныне: Чини Тя ангел и человек, безвестная Мати, хвалят непрестанно, Создателя бо сих якоже Младенца, во объятиих Твоих носила еси.

Песнь 3.

Ирмос: Небеснаго круга Верхотворче, Господи, / и Церкви Зиждителю, / Ты мене утверди в любви Твоей, / желаний краю, верных утверждение, // Едине Человеколюбче.

В Вышних Владыце предстоя, Лазаре чудне, со славными сестрами твоими Марфою и Мариєю, ты прославльшему и друга Себе светло показавшему, просвети душу мою, да воспою Божественную твою память.

Божественное таинство воплощения познал еси воистинну, Лазаре Богомудре, от Самаго Спаса зарю приим премирную.

Слава: Лазаря воздвигл еси Божественным Христе глаголом, и мене многими прегрешеньми умерша возстави, молюся.

И ныне: Вселился еси в Деву плотски, Господи, явился еси человеком, якоже леть бе видену Тебе быти, Юже и показал еси яко истинную Богородицу, и верных помощницу, едине Человеколюбче.

Ин кондак перенесению мощей, глас 8:
Взыде, яко звезда пресветлая, / от Кипра
честныя мощи твоя, Лазаре, / Царствующий
град освящаючи и христолюбиваго царя
веселящи / и люди своя обогащаючи, / тобою
благодать исцеления подаючи, верно зовущим
ти: // радуйся, Лазаре, друже Божий.

Седален, глас 5:

Духа Божественнаго светозарением / тьму
разрушил еси многобожия / и верных сердца
просветил еси, / воспев спасительная
повеления, / и упразднил еси еллинския басни,
Лазаре славне, / Христа Бога моли / даровати
нам велию милость.

Слава, и ныне, глас тойже:

Источник премудрости и предведения, во
Вифанию пришед, / с Марфою сущих вопрошал
еси: / где положиште, рек, друга, Лазаря? /
Егоже ради прослезив Благоутробне, /
четверодневна мертва воскресил еси гласом
Твоим / Человеколюбче и Щедрый, / яко
Жизнодавец и Господь.

Песнь 4.

Ирмос: Ты моя крепость, Господи, / Ты моя и
сила, / Ты мой Бог, Ты мое радование, / не
оставль недра Отча / и нашу нищету посетив. /

Тем с пророком Аввакумом зову Ти: // силе
Твоей слава, Человеколюбче.

Любя Друга и Учителя твоего, служа Того
мановением вседейственным, от прелести
спасаеши человеки, досточудне.

Лазаре, учениче жизни нетленные, умертви в
нас живущий грех живоносною силою
Животодавца, еяже приял еси действие.

Слава: Тебе трепещут, Христе, верей адовы, и
заклепы державою Твоею разрушаются, Лазарю
воскресшу из мертвых гласом Твоим, всесильне
Спасе Человеколюбче.

И ныне: Деву воспоим, яко по рождестве Деву
пребывшую, и рождшую Христа Бога, от
прелести мир избавльшаго.

Песнь 5.

Ирмос: Вскую мя отринул еси / от лица Твоего,
Свете Незаходимый, / и покрыла мя есть
чуждая тьма, окаянного, / но обрати мя и к
свету заповедей Твоих // пути моя направи,
молюся.

Светильники правды вас сияющие знаем,
Лазаре чудне, Марфо и Марие славные,
добродетельми и словом светолучно
просвещающие сердца верных и недугов мглу
отгоняющие.

Едино естество Божества, едино царство и

господство возвещая и воскресение Спасово проповедуя, преблаженне Лазаре, языков стада уловил еси.

Слава: Представ Лазареву гробу Человеколюбче, сего призвал еси, и жизнь подал еси: яко жизнь сый безсмертная человеком всем, яко Бог будущее прообразуя яве воскресение.

И ныне: Матернее дерзновение к Сыну Твоему имущи Пречистая, сроднаго промысления о нас не презри, молимся, яко Тя едину христиане ко Владыце умилоствление благоприятное предлагаем.

Песнь 6.

Ирмос: Очисти мя, Спасе, / многа бо беззакония моя, / и из глубины зол возведи, молюся, / к Тебе бо возопих, и услыши мя, // Боже спасения моего.

Сошел еси, Лазаре, в преисподняя земли и сущия от века зрел еси умерших, но повелением живоносным Друга твоего паки к жизни возвращаешься и на проповедь воскресшаго Владыки отсылаешься.

Вифания проповедует добродетели твоя, Лазаре достоблаженне, гроб твой пустой воскресение всеобщее возвещает и человеколюбие Спаса Господа.

Слава: Любовь Тебе в Вифанию Господи отведе

к Лазарю, и сего уже смердяща воскресил еси
яко Бог, и от уз адовых спасл еси.
И ныне: Невесто Божия, Марие
Богородительнице, избави мя лютых
прегрешений и бед и к тишины пристанищу и
спасения Твоими молитвами направи.

Кондак, глас 8:

Благочестия проповедника истинного / и тайн
неизреченных провозвестника, / Кипра похвалу
честную, / Лазаря Божественного восхвалим: /
Слово бо его избра во други Своя, // Единый
сведый сердечная.

Песнь 7.

Ирмос: От Иудеи дошедше, отроцы / в Вавилоне
иногда, / верою Троическою пламень пещный
попраша, поюще: // отцев Боже, благословен
еси.

Утро сущим из тьмы адския возсиял еси, Лазаре
всечудне, Правды показуя Солнце, из облака,
Девы Отроковицы, человеком возсиявшее.

Ученик неизреченных тайн Христа Бога верен
быв, Евангелие Сего Божественное проповедал
еси верным, всемудре, глаголющим: отцев,
Боже, благословен еси.

Слава: Четверодневный Лазарь, Спасе, яко
услыша низу глас Твой, востав воспе Тя, и

радуясь сие вопияше: Ты Бог и Создатель мой,
Тебе поклоняюсь, и пою воскресившаго мя.
И ныне: Се, Юже рече Деву духом великий
Исайя, во чреве Бога зачат и раждает, Емуже
поем: отцев, Боже, благословен еси.

Песнь 8.

Ирмос: Царя Небеснаго, / Егоже поют вои
Ангельстии, // хвалите и превозносите во вся
веки.

Всю зарю Утешителеву чистым твоим, Лазаре,
прием сердцем, тьму демонов несветлую
потребил еси, верныя просветив.

Яко красны, Лазаре, твои ноги, благолепен есть
и язык, глаголющ славу Христову, и научи звати:
Господа превозносите во вся веки.

Слава: Призываеши убо яко Человек Отца, яко
Бог же Лазаря воздвизаеши. Темже Тя поем
Христе во веки.

И ныне: Ум не может рождества Твоего,
Богородительнице, сказати и изреши слово
изнемогает: Бога бо, заченши, родила еси, Дево,
Егоже превозносим во вся веки.

Песнь 9.

Ирмос: Чистую славно почтим, / людие,
Богородицу, / огонь Божества приемшую во
чреве неопально, // песнями величаем.

К Божественней преложилися еси ныне радости, к райским премирным обителем, идеже праведных чинове, Лазаре Богоносне. Темже ты вси ублажаем.

Празднование памяти твоей молебнo совершает Церковь, с Богомудрыми ты сестрами почитаючи Марфою и Мариєю, и добродетели ваша величает.

Слава: Из гроба, Христе, четверодневнаго Лазаря воздвизаеши, всеистиннаго всем показуя свидетеля тридневнаго Твоего востания.

И ныне: Спасения всех Ходатаицу, явльшуюся человеком и мир просвещшую сиянии боговидныя чистоты, в песнях величаем.

Светилен, глас 8:

Словом Твоим, Слове Божий, Лазарь ныне возскачет к житию паки потек, и с ветвymi людие Ты державне почитают, яко в конец погубиши ад смертию Твоею.

На хвалитех стихиры, глас 1:

Лазаря умерша в Вифании, / воздвигл еси четверодневна: / токмо бо престал еси гробу, / глас живот умершему бысть, / и воздохнув ад отрещи страхом. / Велие чудо, многомилостиве Господи, // слава Тебе.

Друже Христов всечестне Лазаре, / человеком

показался еси верен ходатай / и ныне
милостива благодерзновенными молитвами /
сотвори нам Иисуса Человеколюбца, / не
престай Господа моля всегда // даровати душам
нашим мир и велию милость.

Лазаря праведнаго / с Марфою и Мариєю
достодолжно воспоем: / сии бо, праведною
ходивше стезею, достигоша Небесныя обители, /
достойно ликующе со Ангелы, // нам просят
согрешений оставление.

Слава, и ныне, глас 2:

Велие и преславное чудо совершися во
Вифании, / яко мертвеца четверодневнаго, / из
гроба Христос возгласив воздвиже, и друга
призва: / славословим Его яко преславна, / да
молитвами праведнаго Лазаря / спасет души
наша.

Славословие великое и отпуст.

НА ЛИТУРГИИ

Блаженны от канона песнь 3-я и 6-я.

Прокимен, глас 1: Уста моя возглаголют
премудрость / и поучение сердца моего разум.

Стих: Услышите сия, вси языцы, внушите, вси,
живущие по вселенней.

Апостол ко Евреем, зачало 335. Аллилуиа, глас 4:
Уста праведнаго поучатся премудрости, и язык
его возглаголет суд.

Стих: Праведник, яко финикс, процветет, яко
кедр, иже в Ливане, умножится.

Евангелие от Иоанна, зачало 39.

Причастен: В память вечную будет праведник:

[Предлагаемая служба святому составлена
клириком г. Одессы **протоиереем Илией
Тетерько**]

